



Pour satisfaire au desir des Iuifs, Pilate fait flageller, & couronner d'espines Iesus-Christ ; & en tel estat le montre aux Iuifs.

PILATE ayant interrogé Iesus, appella les Sacrificateurs & Gouverneurs du peuple, leur disant, Vous m'avez présenté cet homme comme pervertissant le peuple : mais en l'interrogeant deuant vous, ie ne trouue aucun crime des choses desquelles vous l'accusez, ne qu'il soit digne de mort ; quand ie l'auray chastié ie le laisseray aller. Or suiuant la coustume on laschoit à Pasques vn prisonnier. Parquoy Pilate leur presenta Iesus avec vn seditieux meurtrier nommé Barrabas : mais ils demanderent que Barrabas fust deliuré ; & incontinent le peuple crioit, Que Iesus soit crucifié. Donc il leur dit pour la troisiéme fois : Mais quel mal a fait cettuy-cy ? ie ne trouue en luy aucune cause de mort, ie le corrigeray donc, & le laisseray aller. Alors donc le Preuost Pilate le fit flageller par les gens-d'armes, qui luy firent tous les outrages & ignominies dont ils se purent aduiser, & ce pour rendre contens les ennemis de Iesus-Christ ; & d'abondant plierent vne couronne d'épines, & luy mirent sur son chef, & l'accoustrerent d'un vestement de pourpre, & se mocquans luy disoient, *Je te saluë Roy des Iuifs* ; & luy bailloient des soufflets. Et apres cela Pilate le montra en tel estat aux Iuifs, ausquels enfin il liura Iesus pour estre crucifié.

S. Matthieu Chap. 27. S. Marc Chap. 15. S. Luc Chap. 23. S. Iean Chap. 18. & 19.